

12 STRATEGI UNTUK MAJUKAN PETANI

SHAH ALAM 20 Ogos — Perdana Menteri, Dato' Sri Dr. Mahathir Mohamad hari ini mengemukakan 12 strategi yang dapat meningkatkan peranan pertanian dalam memberi sumbangan yang bermakna kepada pendapatan petani dan pembangunan negara.

Beliau menegaskan, peranan pertanian perlu dipertingkatkan supaya kecanggihan sektor itu tidak ketinggalan berbanding dengan sektor pembuatan dan perkhidmatan.

Menurutnya, dalam melaksanakan revolusi industri makanan ke arah tahun 2020 faktor - faktor ini perlu dijadikan garis panduan dalam menentukan dasar pengeluaran negara pada masa akan datang.

Produktiviti

Perdana Menteri menegaskan demikian dalam ucapannya semasa merasmikan sambutan Hari Peladang, Penternak dan Nelayan peringkat kebangsaan di Taman Pertanian, Bukit Cahaya Sri Alam di sini.

Strategi - strategi, yang dikemukakan beliau adalah seperti berikut:

- Produktiviti sektor pertanian ditingkatkan supaya menjadi lebih efisien dari segi kos dan daya saing;
- Tumpuan harus diberikan kepada pengeluaran tanaman yang bernilai tinggi dan berorientasikan pasaran;
- Para pengusaha khususnya petani harus bersifat terbuka kepada idea - idea dan maklumat yang mutakhir serta dapat menyesuaikan

mengikut keadaan dan masa;

- Meningkatkan rantai yang lebih jitu di antara industri hiliran supaya lebih berdaya saing;
 - Penggembleran tenaga antara sektor awam dan swasta adalah penting untuk kemajuan dan pengembangan sektor pertanian khususnya dalam pengeluaran makanan serta pengintegrasian sektor pertanian dan pembuatan.
 - Bekalan makanan perlu disesuaikan dengan permintaan dan jumlah pengeluarannya perlu ditingkatkan selaras dengan daya belanja yang meningkat dan jangkaan pertumbuhan penduduk;
 - Usaha - usaha dijalankan untuk meningkatkan kesedaran dan kepentingan rakyat memakan makanan yang berkualiti, berkhasiat tinggi dan berzat;
 - Pengeluaran makanan mengambilkira aspek keselamatan makanan dan faedah bandingan;
 - Usaha dijalankan bagi menjadikan Malaysia sebuah negara yang mampu mengeluarkan bahan-bahan pertanian termasuk komoditi makanan pada harga yang kompetitif di pasaran antarabangsa;
 - Hubungan 'forward' dan 'backward linkage' yang boleh diwujudkan oleh industri pengeluaran makanan kepada pembangunan sektor pembuatan perlu diterokai dan digunakan sepenuhnya;
 - Perlu diwujudkan dengan jelas satu iklim perniagaan dan pelaburan yang sesuai untuk menarik pelabur - pelabur luar dan tempatan; dan
 - Pengeluaran makanan perlu mengambilkira tentang alam sekitar dan kosnya kepada masyarakat. Dato' Sri Dr. Mahathir berkata, kesemua strategi dan program yang diusahakan oleh kerajaan tidak akan dapat mencapai kejayaan hanya dengan cetusan idea - idea saja.
- "Ia perlu dirancang dengan rapi, dijalankan dengan baik dan diawasi perkembangannya.
- "Ia juga memerlukan semangat dan dedikasi

LIHAT MUKA 2

SAMBUNGAN DARI MUKA 1

12 STRATEGI MAJUKAN PETANI

serta menggembleran tenaga seluruh lapisan masyarakat termasuk pegawai-pegawai kerajaan, sektor swasta, peladang, penternak, nelayan dan orang perseorangan," tambah Perdana Menteri.

Oleh itu, jelasnya, kejayaan untuk memajukan dan menggerakkan sektor pertanian supaya selari dengan perkembangan sektor - sektor lain adalah tanggungjawab semua pihak.

Beliau berkata, masih banyak cara pertanian dan bidang - bidang yang belum dicuba boleh meningkatkan peranan pertanian dalam menyumbang kepada pendapatan petani dan pembangunan negara.

"Memandang kepada kemungkinan ini, perkataan 'revolusi' memang tepat dijadikan tema perayaan tahun ini iaitu Revolusi Makanan dan Pertanian Mengelak 2020," kata beliau.

Perdana Menteri menambah, usaha yang lebih gigih perlu dibuat bagi me-

ingkatkan kecanggihan kerja - kerja ladang, mutu pengurusan dan tenaga kerja di kalangan peladang, penternak dan nelayan.

"Pertumbuhan dan daya maju sektor pertanian memerlukan kita mengubah cara pertanian yang tradisional dan yang lama kepada yang bercorak lebih komersial.

"Ini bukan saja membolehkan para peladang mendapat hasil yang lebih tinggi tetapi menggunakan sumber tanah mereka dengan lebih berkesan," ujarnya.

Dato' Sri Dr. Mahathir juga menjelaskan, Malaysia tidak akan menjajah atau menakluki negara lain bagi menambahkan kawasan tanah walaupun ia akan menghadapi masalah tanah terhad apabila penduduknya mencapai jumlah 70 juta orang.

"Kita akan guna tanah yang ada dengan cara yang efisien walaupun tanah yang ada tidak semakin besar," tambahnya.